



東華今年嘅周年傳媒午宴，喺旗下嘅復康中心舉行，請到一班活力又熱情嘅社企員工接待賓客。

推多元化社企 東華三院播正能量

有近二百年歷史嘅慈善團體
東華三院，

今年嘅周年傳媒午宴別出心裁，放棄喺酒店舉行，昨天安排喺旗下嘅復康中心舉行，請到一班活力又熱情嘅社企員工接待賓客，一路食住由佢哋精心炮製嘅美食，睇埋鏗鏘有力嘅擊鼓同感人嘅歌唱表演，小妹覺得為呢次聚餐充滿住正能量！

今次午宴主題為「東華社企展所長」，東華旗下多間社企到場獻技。東華主席施榮恆 (Ivan) 話，東華社企多元化，由飲食、烘焙工房，以至影樓及生態導賞都有，為弱勢社群提供就業機會，最緊要令到佢哋產生自信，活得開心。Ivan呼籲大家多多支持社企，等更多低下階層受惠。

佢哋嘅政總開業口碑一流嘅iBakery Gallery Cafe，Kelly嘅午宴食由佢哋學員整嘅牛扒，味道好好之餘，生熟恰到好處。iBakery近來得到日本京都凱悅酒店教授「京都抹茶曲奇」製作配方，再由烘焙工房嘅殘疾人士親手製作，Kelly食過真係好好味，香脆回甘！

小妹仲係現場撞到東華第四副主席王賢誌 (Vinci)，佢話自己專注院方教育項目，旗下有幾十所學校，好多新事物要處理，笑稱自己書就讀得多，但未想過要從事教育事業，好謙咁話要努力學習。

Kelly Chan



聯絡電郵: editorial@hkheadline.com